

Australia, Malaysia tingkat kerjasama bendung masalah migran
Free Malaysia Today
Nov 20, 2016

Antara kerjasama itu adalah pertukaran laporan risikan dan melakukan larangan rasmi, iaitu dengan mengambil tindakan sekiranya migran berkenaan melalui perairan negara.

LIMA: Kerjasama berkaitan kedatangan migran secara tidak sekata antara topik disentuh dalam perbincangan dua hala Malaysia dan Australia di luar persidangan Kerjasama Ekonomi Asia Pasifik (APEC) di ibu negara Peru, pada Sabtu.

Perdana Menteri, Datuk Seri Najib Razak yang mengadakan pertemuan dengan Perdana Menteri Australia, Malcolm Turnbull berkata, Australia dalam pertemuan itu meminta kerjasama Malaysia untuk membendung isu pelarian yang menghantui negara berkenaan ekoran banjir migran.

“Beliau mahu bendung masalah migran ini yang dikaitkan dengan permerdagangan manusia,” katanya kepada wartawan Malaysia selepas menghadiri program hari pertama Mesyuarat Pemimpin Ekonomi APEC.

Antara kerjasama itu adalah melalui pertukaran laporan risikan dan melakukan larangan rasmi, iaitu dengan mengambil tindakan sekiranya migran berkenaan melalui perairan negara.

Najib berkata, Australia dalam pertemuan itu turut menyuarakan hasrat agar kerjasama dipertingkatkan untuk membendung ancaman keganasan serius.

Tambahan katanya, kawasan serantau mungkin berdepan ancaman baharu, sekiranya Mosul jatuh ke tangan Iraq dan mengakibatkan mereka yang berperang di bawah panji-panji IS pulang ke rantau Asia Tenggara.

Mengenai pertemuan dua halanya dengan Perdana Menteri Papua New Guinea, Peter O’Neill, Najib berkata, perdana menteri negara itu mempelawa Petronas melihat kemungkinan membangunkan kawasan gas asli untuk gas asli cecair (LNG) di kawasan daratan.

“Perdana menteri Papua New Guinea meminta Petronas kaji potensi pelaburan tersebut,” katanya dan menambah O’Neill puas hati terhadap Malaysia sebagai antara pelabur terbesar di negara itu.

Najib berkata, Papua New Guinea juga berharap Malaysia boleh membantu dalam bina upaya sebagai persediaan negara berkenaan menjadi tuan rumah APEC pada 2018.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalysiatoday.com/category/bahasa/2016/11/20/australia-malaysia-tingkat-kerjasama-bendung-masalah-migran/>